



Broj: 02-05-34500-44/17
Sarajevo, 23.01.2017. godine

Na osnovu člana 26. i 28. stav (4) Zakona o Vladi Kantona Sarajevo ("Službene novine Kantona Sarajevo", broj: 36/14 - Novi prečišćeni tekst i 37/14 – Ispravka), Vlada Kantona Sarajevo na **66.** sjednici održanoj **23.01.2017.** godine, donijela je slijedeći

ZAKLJUČAK

1. Prima se na znanje Informacija Radne grupe za realizaciju tačke 5. Zaključka Skupštine Kantona Sarajevo broj: 01-05-30117/16 od 18.10.2016. godine.
2. Informacija iz tačke 1. ovog Zaključka dostavlja se Skupštini Kantona Sarajevo, informativno.



Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premier Kantona Sarajevo
4. Ministarstvo unutrašnjih poslova
n/r ministra
5. Evidencija
6. Arhiva



**IZVJEŠTAJ RADNE GRUPE ZA REALIZACIJU TAČKE 5. ZAKLJUČKA
SKUPŠTINE KANTONA SARAJEVO BROJ: 01-05-30117/16 OD 18.10.2016. GODINE**

Skupština Kantona Sarajevo je Hitnoj sjednici održanoj 18.10.2016. godine donijela Zaključak broj: 01-05-30117/16, u kojem se u tačci 5., između ostalog, nalaže Vladi Kantona Sarajevo "da iz okvira nadležnosti Vlade provede proceduru utvrđivanja odgovornosti Ministra unutrašnjih poslova, Policijskog komesara, kao i odgovornost drugih subjekata koji neposredno utiču na ukupnu sigurnost građana".

S tim u vezi, Vlada Kantona Sarajevo je na 59. sjednici održanoj 20.10.2016. godine donijela Rješenje o imenovanju Radne grupe za realizaciju tačke 5. Zaključka Skupštine Kantona Sarajevo broj: 01-05-30117/16 od 18.10.2016. godine u čiji sastav su imenovani: Elmedin Konaković, premijer Kantona Sarajevo, Amela Dautbegović, ministrica za rad socijalnu politiku, raseljena lica i izbjeglica, Mario Nenadić, ministar pravde i uprave i Kemal Karić, pravobranilac Pravobranilaštva Kantona Sarajevo.

Radna grupa je održala tri sastanka na kojima je razmatrala sve okolnosti te, kojom prilikom, u skladu sa odredbama Zakona o unutrašnjim poslovima Kantona Sarajevo ("Službene novine Kantona Sarajevo", broj: 1/16), **nije utvrdila odgovornost Ministra unutrašnjih poslova** za događaje koji su nastali u jednom u javnosti veoma eksponiranom predmetu. Pri donošenju ovakvog zaključka, Radna grupa se rukovodila sljedećim činjenicama:

1) U članu 5. Zakona o unutrašnjim poslovima Kantona Sarajevo je propisano da:

"(1) Uprava policije je kantonalna uprava u sastavu Ministarstva, čija se nadležnost, organizacija, rukovođenje i način rada i druga pitanja koja su od značaja za rad i funkcionisanje Uprave policije u okviru Ministarstva uređuje ovim Zakonom.

(2) Uprava policije je policijski organ, koji vrši policijske poslove i ima operativnu samostalnost.

U članu 23. Zakona - Ovlaštenja policijskog komesara u rukovođenju Upravom policije - jasno je definisano:

"(1) Policijski komesar je rukovodilac Uprave policije.

(2) Policijski komesar rukovodi Upravom policije i odgovoran je za svoj rad ministru i Vladi Kantona."

Članom 21. u stavu 5. Zakona - Ovlaštenja ministra u rukovođenju Ministarstvom – definisano je da

"(5) Prema Upravi policije ministar je ovlašten da:

a) na prijedlog policijskog komesara donosi podzakonske propise i druge opše i pojedinačne akte za koje je zakonom ovlašten;

b) prati rad policijskog komesara;

c) utvrđuje politike i prioritete u vezi sveobuhvatnih sigurnosnih pitanja;

d) daje svoje izjašnjenje na predloženu godišnju ocjenu o radu policijskog komesara na način predviđen u članu 46. ovog Zakona;

e) na prijedlog policijskog komesara usvaja plan policijskih poslova Uprave policije i

f) vrši druga ovlaštenja koja su mu ovim Zakonom i drugim propisima data u nadležnost"

Iz gore navedenog se zaključuje da je Zakonom o unutrašnjim poslovima propisano da je operativni rad Policijske uprave u potpunosti samostalan i pod potpunom kontrolom policijskog komesara, te da ministar nema ovlasti da se miješa u njegove nadležnosti.

2) Radna grupa je konstatovala da je Vlada Kantona Sarajevo održala niz hitnih/vanrednih sjednica (neke od njih 28.07.2016., 10.10.2016. godine) po pitanju sigurnosti u Kantonu Sarajevo i svojim zaključcima davala određene smjernice policijskom komesaru te tražila dodatne informacije o poduzetim aktivnostima za poboljšanje stanja sigurnosti u Kantonu Sarajevo.

U izvještaju Nezavisnog odbora koji je upućen prema Skupštini Kantona Sarajevo se navodi da je nakon hitne sjednice Vlade Kantona Sarajevo evidentno pojačan intenzitet rada policijskih službenika na terenu.

3) Ministar unutrašnjih poslova je, u skladu sa svojim nadležnostima i članom 53. Zakona, pokrenuo disciplinski postupak protiv policijskog komesara zbog indicija o kršenju disciplinske odgovornosti što je na kraju i rezultiralo donošenjem rješenja i disciplinskoj sankciji policijskog komesara.

Također, ministar je poduzeo odgovarajuće aktivnosti i inicirao, u skladu sa članom 50. Zakona, smjenu policijskog komesara koja je po toj inicijativi bila odbijena, ali je u konačnici, kako je poznato, predmet završen smjenom policijskog komesara po odluci Vlade Kantona na prijedlog Nezavisnog odbora.

4) U trenutku predmetnih dešavanja - narušene sigurnosne situacije u Kantonu Sarajevo, posebno u slučajevima sa smrtnim ishodima mladih osoba na ulicama Kantona, aktualni ministar unutrašnjih poslova, Vedran Mulabidić, je bio na dužnosti nepuna 4 mjeseca. Neovisno od toga, ministar je i u više navrata inicirao razmatranje informacija o stanju sigurnosti u Kantonu Sarajevo što je rezultiralo konkretnim zaključcima Vlade Kantona Sarajevo.

Radna grupa **nije ovom prilikom odlučivala o odgovornosti policijskog komesara** iz razloga jer su nadležna tijela (Nezavisni odbor i Vlada Kantona Sarajevo) o tome donijeli odluku.